

# **Ash-Sheikh Khaja Abul Khair Hazrat Mir Momin Ali Shah Quadri Al-Chisti (Alaihi Rahma)**

**[1919-1972 AD]**



## **Naam-o-Nasab:**

Pidr-e-Maajid (Respected Father) Sayyadi Qutb-ul-Waqt Murshidi o Molaai Hazrat Khaja Abul Khair Mir Momin Ali Shah Quadri Al-Chisti (Alaihi Rahma) ka shumaar naamwar aqtaab-e-zamaana mein hota hai. Aap ki wilaadat sun 2 Teer 1326 fasli, mutaabiq 2 May 1919 AD baroz-e-Ekshamba (Sunday) mein shahr-e-Hyderabad taleemiyaaftah saadat gharaane mein hui. Aap ka silsile-nasab (Progeny) aap ke jad-e-amjad (ancestor) Hazrat Mehboob-e-Subhaani Ghauth-ul-Aazam Ash-Sheikh Syed Abdul Quader ﷺ se jaamilta hai. Hindustan mein aap (RA) ke ajdaad Patancheru, Hyderabad mein aabaad hue t'he. Aap (RA) ke dada Hazrat Mir Rustum Ali Shah Quadri (Alaih Rahma) apne waqt ke mashoor wali wo buzurg guzre hain. Aapke waalid-e-Muhtaram Hazrat Mir Faizullah Shah Quadri (Rehmatullah Alaih) jayyad Aalim-e-deen t'he aur Dargah Mir Momin (RA) Pahadi Shareef Hyd. se badi Aqeedat rak'the t'he. Isi nisbat se unhone apne pehle farzand ka naam Mir Momin Ali Shah Quadri rak'ha.

## **Ta'leem-o-Mulazimat**

Hazrat Mamdooh waalid-e-Muhtaram ne apni ibtedaai daur-e-Ta'leem mein tilaawat, tafseer-e-Qur'an, Hadeeth-o-Fiqha, Riyaazi aur Tib, Maahereen-e-Uloom-e-Arabi-o-Faarsi Asatezah se haasil farmai. B'ad-azan Aap Usmania University Hyderabad se science aur commece mein double graduation kiya. Kuch saal baad tib (Medicine) mein BUMS ki degree bhi haasil farmai. Arabi, Farsi aur Urdu ke alaawa aap angrezi zabaan mein khaasi mahaarat ke haamil t'he. Aap (RA) ne moqtalif mulaazimatein ikhtiyaar farmayin jin nein Commission Offier Hyd Army, Ward Asst. Mahkum-e-Tamiraat, First Grade Accountant Mahkum-e-Fire Service, ke alaawa Mukhlis teacher, doctor-o-hakeem ke manaasib shaamil hein, nihaayat khoobi se nibhaaye.

## **Nikaah Mubaarak**

Aap (RA) ki shaadi mubarak sun 1943 AD mein ba-umar 25 saal Hazrat Sayyeda Begum (RA) saheba dukhtar (d/o) Hazrat Mirza Raheem Baig Naqshbandi (RA) se hui. Aap (RA) ko chaar sahebzaadiyan aur teen sahebzaade tawallut hue. Teen sahebzaadiyon ka wisaal (death) ehd-e-tifli (infancy) mein ho gaya jabke teen sahebzaade aur ek saahabzaadi ba-hamdulillah bakhaid-e-hayaat (alive) hein. Mujh haqeer ko ba-ehsiat-e-pehle farzand aapke wisaal ke ba'ad aap ki jaanasheeni ka sharf haasil hua.

## **Baith-e-Tariqat-o-Manazil-e-Sulook**

Aap (RA) ko apne dada Hazrat Qibla (RA) aur waalid-e-muhtaram se iktesaab-e-faiz-e-baatini (Spiritual Reflection) wiraasat mein mila. Aap (RA) ne 25 saal ki umar mein Hazrat behr-ul-uloom Maulana Mohammad Abdul Qadeer Siddiqui Al-Quadri alm'arroof Hasrat Siddiqui (RA) ke haath par baith-e-Tariqut farmayi aur uloom-e-zaahiri-o-baatini ka iktesaab kiya. Hasrat Siddiqui (RA) ki nigraani mein hi raah-e-sulook ki saqt/sabr-aazmaan manaazil tae hone par halat-e-bedaari mein Deedaar-e-Nabi ﷺ se Musharraf howay aur khurkha-e-Khilafat se naazai ga'ye. Ba'ad azaan (later on) Ash-Sheikh Hazrat Khaja Abul Faiz Shah Mohammad Khalid Wajoodi Al-Quadri alm'arroof Khalid bin Janesaar Yaarjung (RA) ki nazr-e-karm mein aap (RA) ko mazeed nikhaara aur qurqae khilaafat se sarfraaz farmaaya. Hazrat Khaja azeezullah shah 'Irfani Janasheen Hazrat Khaja Ilaahi Baqsh (RA) ki sohbat-e-ba-barkat se bhi aap (RA) ko nihaayat faiz yaabi hui.

*Couplet: Hai saabit har do aalam mein badai mere momin ki*

*Khuda un ka nabi unke khudai mere momin ki*

## **Muqaam-o-Martaba -o-Faiz-Rasaani**

Hazrat Waalid-e-Burzburgwaar ki tamaam tar zindagi behtareen akhlaq-o-kirdaar, tawazu' aur sabr-o-shukr ki haamil rahi. Aap (RA) jahaan huqooqullah mein khuloos-e-dil se 'amal paira rehte wahi huqooq-ul-ibaaad ka khaas khayal rakhte aur us ki adaai mein koi kasar baaqi nahi chodte. Allah aur uske habeeb ﷺ ki tayeed aur fazl-o-karam har waqt aap (RA) ke shaamil-e-haal raha. Mukhtalif tabqon se ta'alluq rakhne waale hazraat aap (RA) ki zaat-e-giraami se faiz haasil karte rahe aur Alhamdulillah aaj bhi aap (RA) ka mazaar-e-purnoor ziyaarat gaah-e- khaas-o-aam bana hua hai.

Haq parasti-o-haq rasi aap (RA) ka shi'yaar-e-zindagi raha. Tauheed-o-Ma'refat-e-ilaahi Aap ka imtiaaz (distinction) t'ha. Ishq-e-rasool ﷺ ke natijay mein Aap ka ta'zeem-e-auliya-o-buzurgaan-e-deen aur musalsil ghurba nawaazi ham sab ke lie mashal-e-raah bana raha. Ye Allah Rabbul-Izzat ka fazl-o-karam hai jise chaahе nawaaz de.

## **Halqa-e-iradat**

Aap (RA) silsil-e-iraadat-e-quadriya-o-chistiya mein bai'th liya karte t'he. Lekin aap (RA) ka silsil-e-iraadat jumla salasil tak wasee' (spread) hai. Aap ke halqa'e iraadat mein bahout badi ta'daad mein log daakhil hue jin mein aksar majzoob hazraat bhi shamil hein jo aap (RA) ke dast-e-mubaarak par bai'th hoke faiziyaab hue. Hazaaron mu'taqideen bhi

aap (RA) ki tawajjo-e-khaas se mustafeed hue aur fehmi-e-saheeh aur tazkee-e-nafs se behraawar hue. Aap (RA) khud bhi aakhiri waqt tak namaaz-o-roza, tilawat-e-Qur'an aur shab bedaari ke paaband raye aur doosron ko bhi sakhti se paabandi ki takeed farmaya karte t'he.

### **Mudahidaat**

Aap (RA) ki zindagi nihayat sakht aazmayshi manazil aur mujaahida se guzri jin mein sehra aur pahaadon mein raat ki taareeki mein zikr-e-ilaahi (zikr-e-jehar) shaamil hain. Zikr-e-ilaahi ka yeh aalam raha ke roz ghanton dozaanon musallah par garq-e-mehwiat rehte. Baseerat ka yeh aalam t'ha ke saael ko kuch kehne ki haajat hi na hoti aur uski haajat rawaai ho jaati aur Aap ki nazr-e-karam se sukoon-e-qalb haasil ho jaata. Aap ke roohaani madaarij ka andaaza ba'eedaz qiyaas (beyond imagination) hai. Aap (RA) un barguzedah auliyaa-e-karaam mein se hain jinhein haalat-e-bedaari mein sarkaar-e-do aalam کے deedaar-e-aqdas ka sharf haasil huwa. Is ke baawajood aap (RA) bandagi-o-aajizi mein ektaae zamaana rahe. Sakhaawat (charity) ka yeh aalam t'ha ke aksar raste mein kisi gharib ke kapde phate dakhe ya sardi mein kanpta t'o apne kapde u's ko p'hnaa kar khud tauliya lapte hue ghar laut jate.

Yahaan aap (RA) ke mujaahidaat, mashaagil, karamaat zindagi ke doosre zaahiri aur baatini husn-e-khoobi ke pehluon ka ihaata mushkil hai. Tafseel ke liye qaara'een aap Hazrat Qibla (RA) ki sawaaneh ka mutaali'ya karein: Couplet;

*Hai rauza farsh par lekin hukoomat hai badi unki*

*Rasool Allah ne azmat badhai mere Momin ki*

### **Irshadaat**

Aap (RA) ke chand aqwaal qaa'reen ke liye pesh-e-qidmat hai:

1. Jab kabhi aap (RA) KO haalat-e-marz ya koi taqleef dar pesh hoti, to aap (RA) farmaya karte t'he "Miyaan ye Allah ka karam hai WO jab bhi dekhta hai humko hi dekhta hai".
2. "Izzat saari Allah ke liye hai. Main t'o u's se mubarrak hoon (ya'ni mujhe na izzat ke paane ki khushi hai na khone ka gam)".
3. "Jo kuch apni zuroori ke alaawa maal hai, wo sab ham, Allah ki raah mein kharch kar detein hain kyunke hum sahib-e-nisaab hone ka intezaar nahi karte".
4. "Allah Ta'ala do dafa' hansta hai, ek us waqt jab WO Kisi KO sanwaarna chaahta hain aur sob lowg usko bigaadna chaahte hain, doosre jab Allah Kisi ko bigaadna chaahta hai aur log us ko sawaarna chaahte hain".
5. "Apni ana-e-muqayyidah ki nafi karo kyonke wo faani hai. To phir Ana-e-Mutlaqa (Allah) ka zahoor (jalwa) tum mein numaaya hoga. Aur yahi abdiyat ka taqaaza bhi hai".

### **Aap ki husn-e-aqeedat-e-Hazrat Sayyed Ahmed Baadepa (RA)**

Aap (RA) ko Hazrat Syed Ahmed Baadepa (RA) [Dargah Shareef 1<sup>st</sup> Lancer] se intehaayi darja aqeedat-o-mohabbat rahi aur jab tak hayaat rahe, paabandi se har saal 11 Jamaadi-ul-Awwal ko Hazrat Baadepa (RA) ke urs-e-mubaarak mein sandal-e-mubaarak ka nazraana pesh kiya karte t'he. Yahi wajah hai ke aap (RA) ka wisaal-e-

mubaarak bhi 12 Jamaadi-ul-Awwal 1393 Hijri mutaabiq 24 June 1972 AD baroz-e-shamba bawaqt-e-fajr Hazrat Baadepa (RA) ke urs ke din hi hua aur aap (RA) usi dargaah shareef ke painti aaraam farma rahe hain. Aap (RA) ki umr shareef 53 saal t'hi.  
**Inna lillahi WO inna ilaihi raji'oon**

Aap (RA) ki mehl-e-mubaarak ya'ne meri waalida muhtarmaa Hazrat Sayyeda Begum (RA) ka wisaal 18 zeeq'ad 1409 Hijri mutaabiq 24 June 1989 AD baroz-e-Jumaa bawaqt-e-Ishaa hua aur unki tadfeen Aap (RA) ki pehlu mein amal mein aayi. Aap (RA) ka mazaar-e-mubarak ihaate Dargah-e-Syed Ahmed Baadepaa (RA) [1<sup>st</sup> lancer Hyderabad] mein ziyaarat gaah-e-ma khaas-o-aam bana hua hai aur Aap (RA) ka urs-e-mubarak paabandi se har saal 12 Jamaadi-us-Awwal KO manaya jaata hai. Sandal-e-Mubaarak p'hle Baadepa (RA) KO paish kiyaa jaata hai phir Waalid-e-Buzrugwaar (RA) KO. B'aade tanaawul-o ta'aam aur Mahfil-e-Sama'a ka ehtemaam kiya jaata hai.

Khaadim-o- faqeer;

**Syed Mohiuddeen Mir Lateefullah Shah Quadri (Quadri)**

Al ma'roof Muneer Pasha Quadri, Farzand-o-Jaanashen Hazrat Mamdooh (RA)